

**UPOREDNI PRIKAZ KLJUČNIH
NOVINA IZ ZAKONA O ZAŠTITI OD
NASILJA U PORODICI I NASILJA
PREMA ŽENAMA U FEDERACIJI BIH,
S POSEBNIM OSVRTOM NA
ELEMENTE PREUZETE IZ
ISTANBULSKE KONVENCIJE I
SUDSKU PRAKSU**

Dejana Petković, magistar prava

*Sudski stručni suradnik Kantonalnog suda
u Sarajevu
dejana.petkovic@pravosudje.ba*

Dostavljen: 05. 12. 2025.

Recenziran: 19. 12. 2025.

Prihvaćen: 19. 12. 2025.

UDK: 343.54/.55-055.2(497.6)

JEL klasifikacija: K38, K42

SAŽETAK

Nasilje u porodici je jedan od gorućih problema u bosanskohercegovačkom društvu, a prvi vid odbrane od te vrste nasilja jeste izricanje zaštitnih mjera, koje žrtvi omogućavaju da na što lakši način izađe iz nasilne sredine, odnosno da udalji nasilnika od sebe. Obzirom na učestalost djela nasilja u porodici, zakonodavna vlast je prepoznala potrebu usklađivanja važećih zakonskih propisa koji se tiču ove tematike, sa Konvencijom Vijeća Evrope o sprečavanju i borbi protiv nasilja nad ženama i nasilja u porodici (Istanbulska konvencija), imajući u vidu da se radi o prvom pravno obavezujućem instrumentu u Evropi u ovoj oblasti koji nudi rješenja koja imaju za cilj nultu toleranciju prema nasilju u porodici. Obzirom da navedena Konvencija predstavlja veliki korak

naprijed u pogledu pravne zaštite od nasilja u porodici, u ovom radu analiziraću najznačajnije odredbe novog Zakona o zaštiti od nasilja u porodici i nasilja prema ženama u Federaciji BiH koje direktno implementiraju Istanbulsku konvenciju, te analizu najznačajnijih novina u odnosu na raniji Zakon o zaštiti od nasilja u porodici u F BiH, sa osvrtom na relevantnu sudsku praksu.

Ključne riječi: *Istanbulska konvencija, radnja nasilja, Zakon o zaštiti od nasilja u porodici i nasilja prema ženama, osnov sumnje, procjena rizika, zaštitne mjere*

**COMPARATIVE OVERVIEW OF KEY
NOVELTIES FROM THE LAW ON
PROTECTION AGAINST DOMESTIC
VIOLENCE AND VIOLENCE AGAINST
WOMEN IN THE FEDERATION OF
BIH, WITH SPECIAL REFERENCE TO
ELEMENTS TAKEN FROM THE
ISTANBUL CONVENTION AND CASE
LAW**

SUMMARY

Domestic violence is one of the most pressing problems in Bosnian and Herzegovina society, and the first form of defense against this type of violence is the imposition of protective measures, which enable the victim to leave the violent environment as easily as possible, i.e. to distance the perpetrator from themselves. Given the frequency of acts of domestic violence, the legislative authority has recognized the need to harmonize the current legal regulations concerning this topic with the Council of Europe Convention on Preventing and Combating Violence against Women and Domestic

Violence (Istanbul Convention), bearing in mind that it is the first legally binding instrument in Europe in this area that offers solutions aimed at zero tolerance for domestic violence. Given that the aforementioned Convention represents a major step forward in terms of legal protection against domestic violence, in this paper I will analyze the most significant provisions of the new Law on Protection against Domestic Violence and Violence against Women in the Federation of BiH that directly implement the Istanbul Convention, as well as an analysis of the most significant innovations in relation to the previous Law on Protection against Domestic Violence in the Federation of BiH, with reference to relevant case law.

Keywords: *Istanbul Convention, acts of violence, Law on Protection from Domestic Violence and Violence against Women, grounds for suspicion, risk assessment, protective measures*

Uvod

Prema podacima o broju prijavljenih i procesuiranih slučajeva nasilja nad ženama, nasilja u porodici i izrečenih pravosnažnih presuda u Federaciji BiH, iz istraživanja provedenog od strane Zajedničke službe Sekretarijata Parlamentarne skupštine Bosne i Hercegovine, od 25.03.2025. godine¹, broj procesuiranih slučajeva nasilja nad ženama i nasilja u porodici, po kantonima u

Federaciji BiH, za 2024. godinu je sljedeći: za Kanton Sarajevo 221, za Srednjobosanski kanton 59, za Unsko-sanski kanton 92, za Posavski kanton 15, za Tuzlanski kanton 105, za Bosansko-podrinjski kanton 3, za Kanton 10. 17, za Zeničko-dobojski kanton 206, za Hercegovačko-neretvanski kanton (podaci za Mostar) 83. Ovakvi podaci ukazuju da je bosanskohercegovačko društvo u cjelini, visokotolerantno prema nasilju² u porodici, te da je isto svakodnevica u našem društvu, pa se postavlja pitanje da li važeće zakonodavstvo može, i u kojoj mjeri, zaštititi osobe koje se suočavaju sa ovim problemom. Pri tome, treba imati u vidu da se naprijed navedeni podaci odnose na prijavljene slučajeve, a velika je vjerovatnoća da isti predstavljaju samo „vrh ledenog brijega“, imajući u vidu općepoznata duboko ukorijenjena shvatanja u bosansko-hercegovačkom društvu da je nasilje „privatna stvar“, u koju ne treba niko spolja da se miješa, pa je u takvom ambijentu žrtva u potpunosti obeshrabrena da iskaže bilo kakav otpor, te da traži adekvatnu zaštitu. Upravo zbog navedenih shvatanja, sam zakon ne može otkloniti problem nasilja u porodici, već samo tretirati simptome problema, sa ciljem da se izbjegnu tragični ishodi i žrtvama omogući dostojanstven život. Osnovni cilj novih rješenja sadržanih u Zakonu o zaštiti od nasilja u porodici i nasilja prema ženama, usklađenih sa standardima Istanbulske konvencije³ jeste da se žrtvama pruži zaštita za najrazličitije oblike ponašanja, koja

¹<https://www.parlament.ba/Publication/Read/29551?title=podaci-o-broju-prijavljenih-i-procesuiranih-slucajeva-nasilja-nad-zenama-i-nasilja-u-porodici-te-izrecenih-pravosnaznih-presuda-u-bosni-i-hercegovini-za-period-2014.-2024.-godine&pageId=0> (očitanje 04. 04. 2026.)

² Dr. Zilka Spahić-Šiljak: *Mi smo kultura u kojoj je nasilje normalizirano do te mjere da ga ne vidimo* (očitanje 04. 04. 2026.).

³ Konvencija Vijeća Evrope o sprečavanju i borbi protiv nasilja nad ženama i nasilja u porodici, Istanbul, 11.05.2011. godine